

Te Bwai n Tangira ae Onoti

“Aio e bon bae n ae te Tamnei ae Raoiroi,” e iango Mehrimah.

Iroun Gretchen Picklesimer Kinney
(E boboto i aon te karaki ae koaua)

E riki te karaki aei i Buranti.

“Mehrimah! Fatima! Ae a roko mitinare!” e wewe-te tinaia.

E kaina ana boki n karaki man Booki Aika a Tabu Mehrimah ao e biri nakon te katangaina. Mitinare a bon reireiniia aia utu taekan Iesu Kristo. Mehrimah ao ana utu bon iaon kawaia n bwabetitoaki. E aki kona tataninga!

E tekateka ma ana utu Mehrimah.

“N te bong aei ao ti na marooro iaon te Tamnei ae Raoiroi,” e taku Unimwaane Moed'i. “E buokiira n namakina te rau ao te mweengararoi mai iroun Tamara are i Karawa.”

“E kaungaira naba bwa ti na karaoi bwaai aika raoiroi,” e taekinna Unimwaane Campbell. “Ao E buokiira n ataa te koaua. Ko a bon bae n tia n namakina te Tamnei ae Raoiroi.”



Mehrimah e iangoa moan reiakinan Ana Boki Moomon. E a tia n namakina te rau ao te kukurei. Anne ae e ataia bwa e koaua. Bon anne te Tamnei ae Raoiroi?

“Imwiin bwabetitoakim, ko na anganaki te bwaintuaraoi ae te Tamnei ae Raoiroi,” e taku Unimwaane Moed'i. “Are nanona E na kona ni mena iroum n *taainako* n buokiko ao n kairiko.”

“N te wiiki aio, tarataraa raoi am iango ao am namakin,” e taku Unimwaane Campbell. “Tarai taai ngkana e taetae nakoim te Tamnei ae Raoiroi.”

N te tairiki anne n tain ara tataro n utu, Mehrimah e noora aron ana namakin inanona. E namakina te mweengararoi ao te rau. Kanga ai aron ae e namakin na bwa iai ae inga nakoina. *E bon bae n ae Te Tamnei ae Raoiroi*, e iangoia.

N tain te taromauri n te Tabati, e kakauongo Mehrimah nakon te anene ae taekan Iesu Kristo. E namakina te kukurei. E anganna te namakin ni kan buokiia aomata. *E bon bae n ae Te Tamnei ae Raoiroi naba*, e iangoia.

Imwain matuuna, Mehrimah e wareware n ana boki n karaki man Booki Aika a Tabu. Tarina, Fatima, e bubutiia bwa ai manga ana tai. E taku Mehrimah ko aki.

E reitinako ni wareware Mehrimah. Ma e a buakaka ana namakin ngke e aki kan tibwauaa ana boki ma tarina.

“Kabwara au bure.” e tuanga Fatima. “Ko tangiria bwa tina uaia ni wareware?”

E tekateka Fatima irarikina. A ikaruoruo ni wareware. Mehrimah e namakina te rau ao te kukurei. *E bon bae n ae Te Tamnei ae Raoiroi*, e iangoia.

N tokina e a roko aia bong ni bwabetito. A nako Mehrimah ma ana utu nakon te umwantabu ao a oneiia nakon kunikai aika mainaina.

E bwabetitoaki moa Mehrimah. E mwaitorotoro te ran, ma e kukurei ngkai e karaoa te berita ae tabu ma Tamana are i Karawa. E nirooia tinana n te taara. Ao ngkanne e a matakua ngke a bwabetitoaki tinana, tamana, ao Fatima.

E a manga oneia Mehrimah nakon oneana aika a mwau. Ngkai e a bon boo aia tai n kamatoaaki.

A katokai baia Mitinare iaon atuun Mehrimah. “Ti kamatoako bwa kaain Ana Ekaretia Iesu Kristo ibukiia Aika Itiaki ni Boong aika Kaitira,” e taku Unimwaane

Campbell, “ao n atonga ae kangai nakoim, e a reke iroum Te Tamnei ae Raoiroi.” E namakina te rau Mehrimah ngke e kakauongo nakon nikiran te kakabwaia are e anganaki.

Imwiin kamatoaan Mehrimah, e inga tinana nakoina. “Tera am namakin?”

“E rangi n tamaroa,” e taku Mehrimah. “Imwiin are a kamenai baia iaon atuu, I namakina te bwai teuana, ao kanga namakinan te rau.” E moangare. “Kanga ai aron ae iai ae tuanga bwa N na maiuakina te maiu ae tamaroa, ni buokiia aomata, ao ni kawakin tuua.”

“Ko ataia bwa tera ae ko namakinna anne?” E titiraki Tinana.

“Eng, I ataia,” e taku Mehrimah, ma matana aika takiakia. “Bon te Tamnei ae Raoiroi!” ●

TE TAMNEI AE RAOIROI

Te Tamnei ae Raoiroi n tabetai e bon aranaki bwa “te Tamnei.” E uoti nakoira rongo-rongo mai iroun Tamara are i Karawa ao Iesu Kristo. E kabebeteira ao n reireiniira kawaira ni karaoi rinerine aika raroi. (Taraa Reirei ao Berita aika Tabu 79:2.) Rairia nakon iteraniba 21 n reiakinii kawai ae tina kona n ongo Bwanaana.